

)*(†)*

SANCTISSIMO DOMINO NOSTRO

CLEMENTI XIII.

)*(PONTIF. OPT. MAX.)*

PRECATUR

SEMPITERNAM FELICITATEM

BASILIVS ARCHIEPISCOPVS



MANILAE.



2 4

THE NEW YORK PUBLIC LIBRARY
ASTOR LENOX TILDEN FOUNDATION
1215 6TH AVENUE NEW YORK 17 N.Y.

THE NEW YORK PUBLIC LIBRARY

THE NEW YORK PUBLIC LIBRARY

THE NEW YORK PUBLIC LIBRARY

THE NEW YORK PUBLIC LIBRARY



THE NEW YORK PUBLIC LIBRARY

THE NEW YORK PUBLIC LIBRARY

THE NEW YORK PUBLIC LIBRARY

THE NEW YORK PUBLIC LIBRARY

BEATISSIME PATER.

*****N HIS VLTIMIS ORBIS FINI-
 * I * bus constituti, accepimus nuper
 * * * * * ex Hispania, VESTRAM BEATI-
 TVDINEM Ore Apostolico pronuntiasse,
 constare de fama Sâctitatis Venerabilis Ser-
 vi Dei JOANNIS PALAFOXII, Episcopi
 prius Angelopolitani, & posterius Oxo-
 mensis. Ac faustissimus quidê hic nun-
 tius invenit nos amaritudine oppressos, &
 in multa patientia calicem Domini bi-
 bentes ob similis causae defensionem, pro
 qua Vir ille Dei viginti supra centum ab-
 hinc annis hausit Angelopoli: Vnde non
 mediocrem ob id attulit nobis tempore
 opportuno consolationem, & cum aliunde
 juxtâ vota nostra, & preces evalerit illud
 VESTRAE SANCTITATIS Decretum, mi-
 rum in modum exultavimus, ac verè su-
 perabundavimus gaudio. Benedictus Deus,
 & Pater Domini nostri Jesu-Christi, Deus
 totius consolationis, cuius divinâ provi-
 dentiâ quemadmodum certe factum est, ut
 Servi sui causa felicissimis adeò auspiciis
 iam sit cepta, ita quoque speramus, bea-
 tissimum cito finem habituram.

In id videntur nobis hodiè conspirare
suspiria Episcoporum, & desideria om-
nium Ecclesiarum, non Indiarum modò,
sed totius etiam populi Christiani, expe-
ctantium optatissimum nobis diem, quo
VESTRA SANCTITAS è Suprema Petri Ca-
thedra Orbi Catholico annuntiet, Venera-
bilem JOANNEM PALAFOXIVM è numero
esse illorum, qui cum Christo regnant sine
fine. Quod quidem nunc piè credimus ad-
ducti morum eius integritate, vitae sancti-
monia, & magnitudine virtutum, quarum
suavissimo odore replevit universam San-
ctorum Ecclesiam. Hae namque virtutes
cum in Excellentissimo Episcopo egregiae
planè fuerint, non intrà unius tantùm Dioe-
cesis limites constiterunt, sed longiùs pro-
gressae, à mari usque ad mare pervene-
runt. Ad id duo praesertim in causa fue-
runt; inimicorum rabies, qui dum per u-
triusq; mundi plagas Venerabilem virum,
iniquum reddere tentarunt, ille nihilomi-
nus optimus Episcopus per omnes natio-
num gentes audivit; & multa etiam libro-
rum eius copia, quibus undique sparsis,
insignis virtutis, pietatis, & doctrinae ip-
sius nomen evasit.

Resplenduit itaque lux eius super can-
delabrum posita ad illuminandos Christi
Fideles, eorumque mentes sale sapientiae
condiendas; quare sicut civitas supra mon-
tem, & in tanta luce collocatus, opera e-
ius bona homines viderunt, Patrique om-
nium bonorum qui in coelis est, gloriam
dederunt. Omnia scripta sua in edificatio-
nem Fidelium elaboravit, ergà quorum ge-
ter.

2
ternam salutem adeò ardentissimâ agebatur
charitate, ut cum unius Ovilis solummo-
do commissâ esset ei cura, exemplo tamen
Sanctorum Patrum, sollicitudo eius omnium
Ecclesiarum. Ecquidè natus esse videba-
tur proximorum bono, quibus sublevan-
dis, viscera misericordiae sortitus à mise-
ricordiarum Patre Deo, mirum certè quan-
tum pecuniae expenderit. Suâ ille manu
pauperibus cibum, potumque ministravit,
ac parvo sibi contentus, omnia propemo-
dum ad eorum necessitates levandas con-
sumpsit, & plusquam habuit erogavit.
Thesaurizavit sibi thesauros non deficien-
tes in Coelis, quibus in sempiterna secula
potiretur. Sed verò nihil est cur velimus
nobilissimas virtutes, quas ad finem usque
vitae impensè coluit, singulas percensere
numerando, cum plurium potius libro-
rum, & operae id sit opus. Vir certè fuit
omnium virtutum, quibus ne deesset qui-
dem exquisitissima, ultimaque perfectio,
examinavit eum Dominus igne persecutio-
num, adeò terribilium, ut horrore sit re-
cordari. Nam supra dorsum eius fabrica-
verunt peccatores; mala quaecumque ver-
bo, scriptisque dixerunt, animae innocen-
tissimae insidiati sunt; honorem maculare
non destiterunt; Dignitatem turpissimè
conculcarunt. Ille tamen per multum tem-
poris penè solus derelictus, & in medio
inimicorum potentissimorum suam vitam
petentium, anathema pro fratribus suis,
& totius mundi factus spectaculum, baiu-
labat amarissimam illam suam Crucem,
sequens Agnum quocumque ierit. Scilicet,

Bonus Pastor posuit animam suam pro ovibus suis, nec perdere eam timuit, dum eas ab ore leonis lucraretur, ac ab audacia insolentissima quorundam luporum, qui eas inhiabant, & sub specie hominum *benignissimorum* extrahere novis doctrinis à Pastoris ovili cupiebant. Quanta tunc pallsus! Verum tantae erat molis Romana ibi iura statuere, Apostolicam Petri auctoritatem firmare, ac Episcopalem potestatem stabilire! Omnia tamen ille vicit, virtute ex alto concepta pugnans adversus potestates tenebrarum harum.

Vtinàm, BEATISSIME PATER, qui similia bella gerimus, strenuum Christi militem imitari mereamur! Saltem iam cepimus. Prosequi conabimur aliqua spe vincendi dum intuemur partem hostium divinitus concidisse; etsi aliundè videamus reliquas Regularium phalanges, qua possunt vi, impetere, vario offensionum genere ferire, verborum etiam clangore iniquorum in nos, nostrumque Clerum martem accendere.

Verùm in tanto illorum adversus nos furore, mirificè nos recreat *Sacer Praedicatorum Ordo*, qui de hac Philippinarum Ecclesia optimè est meritus; nam cum satis propè eum noverimus monasticae disciplinae observantissimum, & optimis, valdeque doctis verbi divini dispensatoribus ornatissimum; tum etiam ipsum expertissimus ab ingressu nostro in hanc Urbem nostri amantissimum, iurium Episcopali acerrimum defensorem, atque adeò laborum, & nostrae afflictionis participem.

Vna

3
Vna igitur simul laboramus, & obsecramus, maledicimur, & benedicimus, persecutionem patimur, & sustinemus, Deum assiduè deprecantes, qui tandem velit corda eorum flectere, à quibus contradicimur, ac ipsorum obsecatas mentes in viam veritatis deducere. Sed sanè plurimùm veremur, ne post tam assiduam pro illis sollicitudinem, frustrà id quaeramus; quippè videntur nobis nimis obdurati in antiquissimo errore, quem à veteribus didicerunt, & veluti per traditionem à Patribus suis imbiberunt. Inde oritur, ut vetera quaeque novis misceant, utque fabellis tamquam pro rationibus utantur, quibus adiungunt magnam cavillationum legem ad convellenda Sancti Concilii Tridentini Decreta, Rescripta Pontificia declinanda, ac similiter plures Regias Schemata, quae eorum strictè praecipiant observantiam.

Atqui duo sunt controversiae capita. Ac primùm exigimus à Regularibus, qui in citionis nostrae Ecclesiis Curam Animarum exercent, ut *sub sint immediatè in iis, quae ad dictam Curam, & Sacramentorum administrationem pertinent, iurisdictioni, visitationi, & correctioni Episcopi, in cuius Dioecesi sunt sitae, quemadmodum tot verbis sacra Tridentina synodus decrevit. Deindè ut (iuxtà eamdem,) Nec ibi aliqui, etiam ad nutum amobiles (quales ipsi etiam Regulares Indiarum videri volunt) deputentur, nisi de eiusdem Episcopi consensu, ac praevio examine per eum, aut eius Vicarium faciendo.*

Verùm utrumque renuunt Parochi Regulares, qui liberos quidè se putant ab iis Tridentini statutis, obiiicientes quaedam privilegia, quae eternum valitura videntur, & immortalia, nam pluries revocata cum sint, vigere adhuc nihilominus praetendunt. Quorum aliqua numerant Concilio Tridentino antiquiora, eorumque praecipuum, ac veluti ceterorum fundamentum illud agnoscunt, quod ab Adriano Papa VI. concessum fuit, (a) quodque ob amplitudinem, & quasi Mare-magnum facultatum in eo Regularibus creditarum, Omnimodam Bullam appellare consueverunt. Et quamvis huiusmodi privilegium ab Oecumenica illa Synodo (si per Regulares licet) revocatum omninò sit, & velut emortuum evaserit; tamen revixisse postea clamabunt vi alterius à SSmo Pontifice Pio V. concessi, (e) quod confirmatum quoque, & innovatum fuit ab eius successore Gregorio Papa XIV. (i)

Quae cum ita sint; aerem verberant Episcopi, dum nituntur persuadere Regularibus, contraria prorsus suis Privilegiis sancita esse postmodum à Clemente Papa VIII. (o) deindè à Gregorio Papa XV.

(u)

(a) Bulla quae incipit Exponi Nobis; exped. an. 1522.

(e) Bulla quae incipit Exponi Nobis; exped. an. 1567.

(i) Duae Bull. una incipit, Quantum animarum, altera, Exponi Nobis, exped. an. 1591.

(o) Bulla quae incip. Religiosorum quorumcumque exped. an. 1601.

(u) insuper à Clemente Papa XI. (a) de-
mum à Benedicto Papa XIV. (e) qui ut
rem hanc redderet indubiam, quatuor A-
postolicas litteras expedivit, quarum duas
posteriores ad instantiam Domini Ferdi-
nandi Hispaniarum Regis Catholici dedit.

Frustra, inquam, agunt Episcopi cum
Regularibus etiam post tot revocationes
privilegiorum, cum nihili faciant ea iussa
Pontificum, quae facili opera norunt elu-
dere, ut ab observantiâ Concilij Triden-
tini se expediant, idque, licet utriusque
ipsorum decreta observari in Ecclesiis In-
diarum à Regibus Catholicis sit prae-
scriptum. Etenim Catholici Hispaniarum
Reges, de Sacrorum Canonum observan-
tiâ optimè meriti, & de Tridentini Con-
cilii executione maximè solliciti, Episco-
pis per Indias sibi subiectas constitutis o-
pem, auctoritatemque semper praestite-
runt, ut legitimâ suâ jurisdictione in Re-
gulares Animarum Curam exercentes in
suis respectivis Dioecesibus pacificè frue-
rentur. Cujus quidem rei certissima sunt
argumenta Schedulae Regiae propemo-
dum infinitae circâ hanc rem diversis tem-
poribus expeditae, quae ut maius eis, &

B 2

per.

(u) *Bulla, Inscrutabili, exped. an. 1622.*

(a) *Bulla, quae incip. Cum licet; expedita
ad Archiepiscopum Manilae per manus Re-
gias, an. 1705.*

(e) *Prima, quae incip. Firmandis, atque
asserendis, exped. an. 1744. Secunda, Quam-
vis, exped. an. 1745. Tertia, Cum super,
exped. an. 1751. Quarta, Cum alias, exped.
an. 1753.*

perpetuum robur accederet, in Leges redactae sunt. Verùm in tantâ Constitutionum, & legum copiâ, sonant adhuc in auribus nostris Regularium privilegia, & non sonant modo, sed ea ipsi omninò valere contendunt, imò eisdem cum magno Animarum discrimine utuntur.

Sed quaenam est, BEATISSIME PATER, eorum privilegiorum tanta vis, ut nullis Summorum Pontificum contrariis statutis infringi postea potuerint? Aut quaenam potius est horum Regularium facultas, & potentissima virtus, ut potestatibus sublimioribus tan facilè, & temerè resistere non vereantur? Quaenam est ipsorum vivendi, agendique libertas, ut utriusque supremæ auctoritatis, quibus in terris nulla maior, sacratissimas leges impunè liceat ipsis repugnare, ac praetextu quorundam privilegiorum, quae nullam sunt, normam sibi operandi ad libitum in rebus Ecclesiae gravissimis statuere! Profectò, dum Regulares ita se gerunt, ut Episcoporum jurisdictionem semper, & omninò fugiant, assequuntur quidem eiusmodi immunitatem, sed cum id contra apertissimam Legislatorum intentionem, & voluntatem fiat, à Romani etiam Summi Pontificis, Dominique Regis auctoritate exempti quoque hac super re satis videri volunt. Imo verò ab eis constituta se venerari humillimè confitentur, ac utriusque fidelissimos esse Ministros vocitant, quod certè ita esse credimus, sed opera desideramus; dicunt enim, & non faciunt. Interim autem talia faciunt, quae
maxi-

maximè dedecent Ministros Christi.

Etenim cum, Pontificiis Constitutionibus, ac Regiis Schedulis in medium productis, nimis ab Episcopali jurisdictione urgeri sentiunt; tunc quidem homines Religiosi terrorem nobis incutere, & omnia in transversum agere tentant; nam in suae ipsorum causae desperationem adducti ob perspicuam satiuncularum, quas contra proferre assueverunt, inefficaciam, furore quodam correpti, acerbè porrectis libellis minantur, deserturos se insimul omnes Insularum Parochias, & absque Sacerdote, & Altari Populos relicturos. Quam desertionem eo insolentiùs nobis obiectant, quo certo est certius, pari in eventu eam aliquando exequi optimos Vineae Domini mercenarios, & tentasse, & cepisse. En, BEATISSIME PATER, quem ad finem lese effrenata iactet Regularium audacia! Atque huius generis argumentis ad modum torquent nos, quò à re proposita desistamus, propter Clericorum inopiam, quam in praesens hi Fratres nostri Episcopi patiuntur.

Constat igitur Philippinarum Parochos Regulares suam ab Episcopis quoad animarum regimen exemptionem haud posse defendere, nisi vi, & minis. Quod si ex arborum fructu earum naturæ genus dignosci debet, patet iam quo Religionis spiritu regantur ii Regulares cum flocci eos facere intueamur bonum commune Reipublicae, horum Populorum fidem, totque animarum salutem, quibus omnibus non

dubitant anteposere propriae vitae commoditatem, & omnimodam à legibus Ecclesiasticis agendi libertatem.

Nec tamen malarum artium, quibus pro hac re abundant, hic finis. Abyssus abyssum invocatur, atque incredibile videtur quantum laborent, ut novis criminibus enorme illud crimen adaugeant.

Optimè Viri callidi norunt, quàm esset ipsorum nomini, & Instituto ignominiosum, si vulgus intelligeret, eos non alia de causa velle deferere administrationem Populorum, quibus praesunt, quàm unius Iurisdictionis Episcopalis odio acti: quare, ut quo pollent dolo, hanc infamiae notam à se pellant, Iurisdictioni potius Episcopali apud gentes has omnem causam malorum adtribuunt, quae ipsissimè Regularium malitiâ sequerentur, si in praxim reduceretur. Enim verò quid fatigamur? Nonne hi ex illis sunt, qui dicunt bonum malum, & malum bonum, vaniloqui, protervi, tumidi, seipsos amantes, inobedientes Praepositis Ecclesiae Dei, voluptatum amatores magis quam Dei, habentes quidem speciem pietatis, virtutem autem eius abnegantes, quos vitare nos Paulus monet? Nam quatenus sunt illa mala, quae passim praenuntiantur, si statuatur Episcopalis Iurisdictionis defectio Regularium Parochorum, qui propterea deferrent omnes Populos; indeque solitudo Ecclesiarum, harumque gentium, & fidei desolatio.

Verum quid iniuriosius excogitari unquam potuit in Spiritum Sanctum, qui

posuit Episcopos regere Ecclesiam Dei, quam adquisivit sanguine suo? Quid insolentius in Sanctam Tridentinam Synodum, quae à Spiritu Sancto edocta decrevit, ut Regulares Parochi *immediatè subsint* Episcoporum Iurisdictioni? Quid audacius in Summum Pontificem, Universalis Ecclesiae caput, qui multoties ita esse debere declaravit, & iussit? Quid scelestius in ipsum Dominum nostrum Regem Catholicum, qui pluries etiam iuxta Sedis Apostolicae statuta id fieri precepit? Etenim si ex eo Iurisdictionis Episcopalis usu, & non potius ex pravitate Regularium, tot tamque perniciosissima mala evenire possent, nonne admodum contraria statuissent? Ipsi, ipsi certè Parochi Regulares tunc casus Templum Dei everterent, in cuius edificationem, non verò in destructionem constituti sunt Episcopi, quibus adiuvari potius deberent, & non iis persecutionibus facere eos gemere sub onere tanti Ministerii, cum pervigilent supra gregem Dominicum, eosdemque Parochos quasi rationem pro utrorumque animabus Deo reddituri.

Ecquidem constat, Episcoporum esse, oves supremi Pastoris Christi pascere, ac de optimis Ministris Ovilia suae Dioecesis providere, omnique etiam cura vigilare super his, ne dormiant, sed magnâ sollicitudine studeant adimplere sui opus Ministerii. Parochorum verò, etiam Regularium (praeter ea) est, quoad Animarum curam subiacere Episcopis, quorum Ecclesiis praesunt. Si autem Parochi,

officii sui immemores, insurgant adversus proprium Episcopum, eique Baculum Pastorale è manibus detrahant; tunc certè de Ordine Hierarchico, divinitus instituto, actum erit. Quodsi Episcopus, hac conspecta divini Ordinis everfione, commotus, & coactus, sese iterum erigere laboret, ac illud Episcopatus inligne, sibi ereptum, recuperare: ex adverfo autem obstent Parochi, atque in corde suo dicentes, non est Deus, qui cogere nos possit, deserant Populos, notissimoque cum Ecclesiarum damno fugam arripiant; utrorum quis peccaverit? Episcopus ne, qui honorem Dei viventis zelans, studeret ab ipso, pro animarum bono regimine, constituta, sed nihilominus everfa, in suas quaeque sedes restituere; an potius Parochi, qui superbia quadam elati Episcopo contradicerent, divinisque, & humanis iuribus spretis, Sanctuarium Magni Dei sus deque verterent?

Atque ex his, BEATISSIME PATER, dignosci poterit, quibus cum hominibus agamus. Cum iis scilicet, qui in rebus huius momenti norunt mutare quadrata rotundis, & cum iis, qui cum primum vinum, bonum posuerint, postea inebriati, tunc id quod deterius est cogitant. Profecto haud potest negari, Regulares omnium primos ad has Insulas adpulisse, quò Iesu Christi Evangelium gentibus Idololatriis annuntiarent, quibus laborantibus huic Ecclesiae fundamenta iacta sunt. Itaque primum vinum, bonum posuerunt. Multitudine autem credentium decursu temporis facta

7
Ista gloriati sunt in laboribus suis, cum gloriari eos non oporteret, nisi in Cruce Domini Nostri Jesu-Christi, ac separatim, & independenter ab huius gregis Pastore operari concupiverunt; unde sudore laborum suorum inebriati, magno fuerunt impedimento ad stabiliendam Ecclesiae Sanctae disciplinam, quae unanimi veterum Patrum sententia, fidelis est custodia, & veluti anima regiminis animarum. Itaque abierunt in vias suas, ut nulli huius Ecclesiae Episcopo subiecti viverent; quod quidem ut assequerentur, id quod deterius est cogitarunt: nempe minas, & vim Episcopis, desertionemque omnium Parochiarum, si iuxta ea quae in Ecclesia constituta sunt visitare eos vellent, & reliquum Iurisdictionis Episcopalis erga ipsos exercere.

Iam verò suprema haec sunt cuiusdam desperationis, in quae erumpunt ad vitandam Iurisdictionem Episcopalem. Sed prius aliis mitioribus armis adgrediuntur, quibus bonum nostrae causae finem avertant, ad idque viam sibi parare consueverunt plurium cavillationum copia instructi. Quippe rem umdique circumspectiunt, si aliquid inane inveniant, quod statim obiciant, ut causam hanc paucim suspendi gaudeant, & ne hoc modo unquam accadat, ut Rescripta Pontificia, & Sacra Tridentina Synodus oblivertur. Igitur Privilegia ad libitum construunt, addunt, amplificanc. Eorum autem Revocationes restringunt, deprimunt, ac qualibet de causa reiciunt. Miriades fallaciarum semper

consectantur, quarum multitudine rem meridiana luce clariorem obnubilent, obscurant, confundant. Et cum res haec sit maximo periculo animarum salutis, nihilominus leti modo vivere apparent, qui vel talia cogitant, vel iam defunctorum cogitatis utuntur. Quae quidem saepe nobiscum mirabundi reputantes, multum sane doluimus, cum animadvertimus quam longe lateque per mortalium animas grassata sit pestis illa morum veritatis, & sanae doctrinae *Probabilismus*; cuius praesidio si circa alia homines subtilissimi se muniant, praecipue circa hanc rem.

Nam cum decretum Concilii Tridentini super Iurisdictione Episcoporum in Parochos Regulares, sit toties à Sede Apostolica innovatum, & repetitum: cum millies etiam executioni demandari oportere à Domino Rege sit praescriptum: cum Privilegia, quae adlegantur à Regularibus, nulla in rerum natura sint, quippe saepissime revocata: cum denique causa iam finita sit, sed tamen nondum finitus error. Etenim in re indubia, & inconcussa, adhuc cecutire volunt plurimi Regularium, qui desideriis suis, & non potius veritati consulentes, satagunt investigare ratiunculas adversus clarissima statuta, & leges, ut faveant cum animarum discrimine propriae ipsorum *libertati*; & *exemptioni*.

Mira nobis opponunt, mira loquuntur, mira etiam scripturiunt. Eorum quidam non dubitant asserere, nullam esse vim Constitutionum Apostolicarum, à quibus
sua

sua esse revocata Privilegia, dicimus; quia, inquit, praescriptum est iam de Iurisdictione Episcopali. Alii aliter id ipsum adfirmant, oppugnantes, ei (modi sua Privilegia, natura sua esse irrevocabilia. Alii revocari posse concedunt, sed revocata esse negant, ob vitia quae Constitutionibus illis Pontificiis inurere solent. Alii denique revocata fortasse concedunt, sed in praxim reduci debere negabunt, cum id reputent inconveniens ipsorum fragilitati, quae sustinere forsan non poterit immensum illius Iurisdictionis onus.

Quae cum mira, & inaudita sint, non desunt tamen unicuique horum suae sententiae Patroni ex ipsis Regularibus, quorum huiusce generis scripta iis prodigiis, & portentis referta sunt; quos Patronos suspiciunt tanquam insignes in Ecclesiâ Doctores, & quaedam sapientiae Oracula, eosque propterea pluris estimant quam ipsos Concilii Tridentini Patres, & quam Oraculum Ecclesiae Universalis.

Atque omnia haec adeo sunt vera, ut horum causa in vanum sudaverit hucusque Roma cudendo tot statuta adversus praedicta Regularium Privilegia; & nisi remedia huic tanto malo adplicentur, quid in futurum sperandum est nobis ex tanta obloquendi, & opinandi illorum licentia super Constitutionibus Apostolicis? Profecto nihil, nisi ut crescant, & in miserandam Ecclesiasticae auctoritatis perniciem quotidie maius robur accipiant gravissima illa damna, quae Innocentio X. Pontifici Maximo indicavit Venerabili Episco-

pus **JOANNES PALAFOXIVS** in celeberrima ad illum Epistola; in qua cum dixisset, nocentissimum esse dignitati Sedis Apostolicae liberum illum modum interpretandi Apostolicas Constitutiones, & Privilegia; causam reddidit: Nam, inquit, hac interpretatione auctoritas, & potestas Pontificum infringitur, Ecclesiae gubernatio turbatur, & omne Sacrae Iurisdictionis robur, & dignitas debilitatur, & quod nevarium est, omnes penè à Sede Apostolica Constitutiones, quae quotidie magno Reipublicae Christianae commodo statuuntur, & divulgantur, ad inanem, & vanam, & umbratilem legum formam rediguntur. Nihil hoc verius, ac nihil quoque remedio dignius.

Proinde nihil felicius Ecclesiae Catholicae hac tempestate accidere poterat, quam ut nocentissima haec germina Probabilissimi penitus abscinderentur. Quid verò, quod hoc quotidie fieri speramus! Experimur enim sanam doctrinam in Christianâ Republicâ novas in dies vires accipere. Albescere zizania intuemur. Prope esse estatem conspiciamus. Vnde illi tot malorum radici perniciosissimae iam iam adpositam securim videmus. Vtinam; quod à Deo Optimo Maximo precamur; Universalis Ecclesiae clavum tenente Summo Pontifice **CLEMENTE XIII.** è medio agri Dominici haec zizania eradicentur, & sub tanto Ecclesiasticae disciplinae, sanaeque Doctrinae Vindice illarum semina pravorum Doctrinarum diris devoveantur. Quod quidem opus sanè arduum; sed tantum Pontificem res ista quaerit, cui assequen-

dae

9
dae certe non deest validissimi coope-
ratores.

Quoad nos verò attinet, etsi virium
nostrarum debilitatem non ignoremus, &
minimi propterea omnium finus Epil-
coporum, curabimus tamen ne in vacuum
omnino laboremus. Ager, qui nobis ob-
tigit colendus, zizaniarum fecundissimus,
ac undequaque spinis est confusus, quibus
malis ut pro rerum necessitate aliquo mo-
do mederemur, bonum semen seminare
statim studuimus. Ac praecipue curas in-
tendimus, ut Seminarium Ecclesiasticum
institueremus, in quo boni, strenuique
Operarii ad animarum curationem tor-
mentur, ac cuius subsidio statui possit Ec-
clesiastica Disciplina. Cui operi utilissi-
mo licet perficiendo non nobis suppetat,
spem verò satis bonam habemus, Dominum
Regem nobis adiuturum. Nam illud est
CAROLI III. Hispaniarum Regis Catholi-
ci penè divinum cor ut cum nequeat nisi
benefacere, nobilissima quoque eius stu-
dia in id praesertim diriguntur ut quemad-
modum Respublica, ita etiam Ecclesia op-
timos habeat Ministros. Profecto videtur
è genere Sacerdotali electus ad res divi-
nas curandas, Ecclesiarum bono providen-
dum ac earum felicitatem promovendam,
quo regnante firmissimè confidimus, hanc
Philippinarum Ecclesiam, quoad regimen,
Doctrinam, disciplinam, fidem etiam
magna incrementa habituram.

Verùm interea ob immensum quo ab-
sumus à Regia maris tractum, multa ab his
Regularibus patimur, qui cum nolint pro-

prio Episcopo subesse quoad curam Animarum, egrè etiam ferunt Seminarii institutionem, in quo Clericorum copiam non mediocrem intuentur, satis idoneam ad Parochias administrandas, praeter plures alios, qui ad normam ibi statutam facti, & formati, exierunt postea ad Parochi munus lecti, cui plenè profecto satisfaciunt. Hinc ergo invidiae, obmurmurationes, detractio- nes, quibus non verentur tam nos, quàm nostrum Clerum apud gentes diffamare, domos circumcursantes secularium, & quae non oportet loquentes, imo quae nec licent, cum non nisi scandala pariāt in destructionem huius tenèrrimae adhuc Ecclesiae. Itaque undique nos premunt potentia, & dolo, calumniis, & pravis machinationibus. Sed undique etiam premimus constantia, & veritate, patientia, & amore, semper parati ad vitam prius emulorum irae tradendam, quam Ecclesiae statuta, sedis Apostolicae iussa, & Baculum Pastorale prodamus.

Ad id certè, praeter alia, stimulos nobis admovet invictissimum Venerabilis JOANNIS PALAFOXII robur, cuius data occasione, in nostra excidit calamus, ut VESTRAE BEATITVDINI quamdam statum nostrae Ecclesiae ideam exhiberemus. Capita inveterati damni solummodo indicavimus, sicuti & laborum, quos pro medicina adponenda perferimus. Verùm quae insignis ille Episcopus pertulit pro Ecclesiastica reformatione procuranda, maxime solantur nos, animosque nobis faciunt ad equalia quoque, si Deo ita placue-
rit,

rit, perferenda. Illius imago virtutis, & constantiae nocte, dieque per omnes horas nobis obversatur; & mirum certè quantum eius memoria ad omnia haec toleranda proffit. Ex hoc vero probè intelligimus quos uberes fructus ex tanti Episcopi virtutibus ceteri possint percipere ad militādum pro Ecclesiastica disciplina, & animarum salute, praesertim si exemplar hoc illustre, quod sequi debeant, solēniter à VESTRA SANCTITATE probatum è Cathedra Petri videant. Per Deum igitur immortalem rogamus VESTRAM BEATITVDINEM, velit totis viribus impendere quod Sanctissimae vitae superest in hac causa, quae communis est, perficienda, ut quantocius omnes Episcopi mereamur hic colere cum universa Ecclesia admirabilem hunc Episcopum, quem confidimus VESTRAM BEATITVDINEM, colesse illa gaudentem visurum, cum sibi apparuerit gloria Magni Dei.

Etiam precamur VESTRAE BEATITVDINI salutem, ad cuius pedes humillimè provoluti, huic Gregi, & Pastori suam Apostolicam Benedictionem, impartiri velit, enixè rogamus. Manilae decimo quinto Kal. Novembris an. 1768.

-15664-
May 1930

BA768

S3115

1-SIZE